



1. oktober 2012

Inatsisartut suleriaasianni § 37 naapertorlugu Naalackersuisunut apeqqutit imaattut matumuuna saqqummiuppakka:

**Naalackersuisunut apeqqutit:**

- 1. Unammilleqatigiinnermut Nakkutilliisoqarfik inatsisissatut siunnersuutitut saqqummiunneqartoq pillugu unammilleqatigiinnermut akornusiisumik kinguneqaateqarsinnaanera pillugu oqaaseqaraluarpalluunniit, Unammillernermit inatsisip Inatsisartut inatsisiliorsinnaanerannut killiliisuunnginnera Naalackersuisut uppersarsinnaavaat?**
- 2. Unammilleqatigiinnermut inatsit tunisassiortut kalaallit illuatungaani nunatsinni nioqqutissanik eqqussuinnermik ingerlatsisut akornanni killiliinissamik siunertaqannginnera, taamaalillunilu pisortat tapersiisinnaanerannut killiliisuunnginnera imaluunniit pisortat inatsisiliaat aqqutigalugit nunatsinni tunisassiat avataanit eqqussukkanut sanilliullugit unammillernikkut iluaquserneqarsinnaanerannut killiliisuunngitsoq Naalackersuisut uppersarsinnaavaat?**

(Inatsisartunut ilaasortaq Karl Lyberth, Siumut)

**Tungavilersuut**

Inatsisartut 2012-imi upernaakkut ataatsimiinneranni Aalisarnermik piniarnermillu inuussutissasiutillit inuussutissarsiorterannik siuarsaneq pillugu Inatsisartut peqqussutaata allangortinneqarnissaa pillugu aalajangiiffisassatut siunnersuummik saqqummiussivunga, taamaalilluni taamaallaat umiatsiaaqqanut nutaanut Kalaallit Nunaanni sanaartorneqartunut tapiisoqarsinnaalersillugu. Siunnersuut inatsisartut ataatsimiinneranni maanna ingerlanneqartumi siullermeerneqassaaq.

Siunnersuut Unammilleqatigiinnermut nakkutilliisoqarfimmut oqaaseqarfigisassanngorlugu nassiuunneqarsimasooq, kiisalu siunnersuut akuersissutigineqassappat, tamanna unammilleqatigiinneq pillugu inatsimmi § 12, imm. 2-mut akerliussasooq Unammilleqatigiinnermut Nakkutilliisoqarfik oqaaseqartoq Naalackersuisut akissuteqaamminni saqqummiuppat.

Taamatut naliliineq tupaallaatigaara. Unammilleqatigiinnermi pillugu inatsisartut inatsisaanni nr. 16, 19. november 2007-imeersumi siunnersuutikkut Unammilleqatigiinnermut Ataatsimiititaliaq pisortat aningaasaatai atorlugit inuussutissarsiutigalugu suliffeqarfinnut aalajangersimasunut tapiissutit unitsinnissaannut utertillugilluunniit akilernissaannut peqqussuteqarsinnaalersooq allassimavoq. Taamaattoq § 12, imm. 2 nr. 2 naapertorlugu pisortat inatsisaat naapertorlugit tapiisarneq pisimappat taamatut peqqusisoqarsinnaannginnera aalajangersarneqarpoq.

Unammilleqatigiinneq pillugu inatsimmut nassuiaatini “pisortat inatsisiliaat” ilaatigut inatsisartut inatsisaattut, inatsisartut peqqussutaattut kiisalu nalunaarutaattut paasineqassasut allassimavoq.

Aalajangiiffisassatut siunnersuummi saqqummiussanni ullumikkut aalisarneq piniarnerlu pillugit inatsisartut peqqussutaanni aalajangersakkat allangortinneqarnissaat pivara, taamaalilluni inuussutissarsiutigalugu umiatsiaaqqamik nunatsinni sanaartukkamik pisaarnissamut atatillugu

taamaallaat tapiisoqasinnaalersillugu. Taamaalilluni nunatsinni umiatsiaaqqat sanaat iluaquserneqarnissaat siunertarineqarpoq. Tamanna immaqa suliffeqarfinnut umiatsiaaqqanik nunatta avataanit eqqussuisunut unammilleqatigiinnikkut innarliinertut isigineqarsinnaagaluarpoq. Uangalu paasinninnera naapertorlugu Inatsisartut inatsimmik nunatsinni umiatsiaaqqanik sanaartortunut illersuisumik aalajangiippata, taava unammilleqatigiinnermut inatsit Unammilleqatigiinnermut Nakkutilliisut akuliussinnaanerannut pisinnaatitsinngilaq.

Taamattaaq paasinninnera naapertorlugu unammilleqatigiinnermi inatsit nunatsinni sanaartortut akornanni kiisalu nunatsinni nioqquteqartut (tassunga ilanngullugit nioqqutissanik eqqussuisartut akornanni) killeqanngitsumik unamillernissamut periarfissiivoq – taamaattoq sanaartortut kiisalu niqquteqartut/eqqussuisut akornanni unammillerneq ilaatinneqarani. Taamaattoqassagaluarparpami nunatsinni sanaartornermik ingerlataqartut pisortanit tapiissutisisartut ingerlatsinerat avataanit eqqussuisunut unamillernikkut equtitsissaaq. Soorluttaaq savaatilinnut tapiissutit Newzealandimiut savaataasa quttoraasa neqaannik eqqussuisunut tunngatillugu unammilleqatigiinnermut inatsimmik unioqqutsitsinerussagaluartoq. Aalisarnermut inuussutissarsiortunut tapiissuteqarneq canadamiut raajaataannik eqqussuisunut tunngatillugu unammilleqatigiinnermut equtsitsissagaluartoq. Piniartunut tapiissutit amernik eqqussuisunut unammilleqatigiinnermut equtitsissagaluartoq. Uangali unammilleqatigiinnermut inatsit taamatut paasinngilara, inatsimmi taamatut paasineqassagaluarpat eqqarsaatigeqqittariaqarsimassagaluarparput.

Taamaammat Naalakkersuisut akissuteqaataat paatsoornermik aallaaveqartutut isigaara; immaqa attaveqatigiinnermi paatsooqatigiittoqarsimavoq, tamannalu Naalakkersuisunit uppersarneqarsinnaassappat nuannaarutigissaqara.

Ullut qulit ingerlaneranni akineqaqquvunga.